

# Trais necrologs

Anna Lindh, Edward Teller, Leni Riefenstahl

DA GUIU SOBIELA-CAANITZ

■ **En gnanc in'emna, la segunda da settember, èn mortas trais personalitads che simbolisavan mintgina in aspect da noss temp. Ils onns decisivs da las emprimas duas sa situeschan tranter 1934 e 1945, ma domadas èn lur idas vinavant en la direenziun tshernida; i sa tracta da la cineasta e fotografa tudestga Leni Riefenstahl (\*1902) e dal fisicher american Edward Teller (\*1908), morts respectivamain ils 8 e 9.** Gist ils 11 da settember è morta assassinada Anna Lindh (\*1957), ministra svedaisa da l'ambient 1994, promotura da l'adesiun da Svezia a l'Uniun europeica 1995 e lura, dapi 1998, ministra da l'exteriur da ses pajais.

En ses numer dals 15 ha il magazin viennais «Profil»\* deditgà in necrolog bain ponderà a mintgina da lezzas personalitads.

## Per l'avertura al mund

Il mazzament brutal da la ministra ha commovì il mund. Politica exteriura per la Svezia vul dir engaschi solidar umanitar per la pasch ed il svilup. 1944 ha il diplomat svedais Raoul Wallenberg, en servetsch a Budapest, salvà var 20 000 gidieus da la deportaziun en champs da concentraziun; l'Armada cotschna ha sin quai «liberà» l'Ungheria e mess en fermanza Wallenberg ch'è svanì per adina. Ils victurs da 1945 han mussà pauca chapientscha per la neutralitad svedaisa; il pajais ha stuì surdar fugitivs a l'Uniun sovietica (US), pia a la mort segira, cunzunt Lettons, burgais d'in pajais annectà da Moscvà en violaziun dal dretg internaziunal. Ma la Svezia ha savì gudagnar respect per amur da ses engaschi en incumbensas

da l'ONU. Tranter ils Svedais che han unfrià lur vita en lez senn ston ins menziunar Folke Bernadotte (1895–1948) e Dag Hammarskjöld (1905–1961). L'emprim, suprastant da la Crusch cotschna svedaisa, ha salvà var 30 000 Danais e Norvegiais dals champs da concentraziun tudestgs ed è vegnì mazzà da terrorists israelians en settember 1948 tar ina missiun da mediaziun da l'ONU. Hammarskjöld, secretari general da l'ONU davent da 1954, è mort en in accident misterius, sgulond per la pasch atras il Congo. Misterius resta era l'assassinat da l'emprim minister svedais Olof Palme (1927–1986), promotur d'ina diplomazia engaschada per quels pajais ch'ins numna oz «il Sid». Alfred Gusenbauer, parsura da la Partida socialdemocrata austriaca, punctuescha en «Profil»: «Anna Lindh cumbatteva per l'avertura al mund e la toleranza. Sco gronda Europeana ha'la liberà la Svezia da sias retegnientschas naziunalas» (p. 113).

Redactura Sibylle Hamann: «La ministra da l'exteriur ha accumulì ina vieueta era tar la neutralitad, segund pilaster da l'ideologia statala svedaisa, (...) confermond che la Svezia na restass da la vart sch'in pajais europeic vegniss attatgà. Avant dus onns han ils socialdemocrats stgassà la noziun da neutralitad da lur statuts. La Svezia na s'enclegia betg pli sco 'neutrala', mabain sco stadi senza alianza militar» (p. 110).

## Dus umans dubius

Vaira different d'Anna Lindh era Teller, descrit en in auter necrolog da «Profil» (p. 141). Tenor il biolog Konrad Lorenz (1903–1989) «persunifitgava Teller il mal en la scienza moderna».

1943–1945 a Los Alamos (New Mexico) ha' gida a sviluppar l'emprima bumba atomica. Lura «cun sias interenziuns politicas ha' promovì il svilup e l'emprima prova (1952) da la bumba idrogenica (...). En ils onns tschinquanta avisavan blers scienzads dals privels d'ina guerra atomica.

Teller perencunter smaladiva mintga furma da controlla d'armament, perquai che be l'intimidaziun [da l'adversari sovietic, G. S.-C.] possia mantegnair la pasch (...). Sco cussegliader da Ronald Reagan, president dals Stadis unids 1981–1989, ha Teller promovì sia idea preferida, numnadamain la defensiun (...) ord il spazi (...). A la fin ha' gi raschun. Be il project da defensiun ord il spazi ha stimulà l'armament ed accelerà la demoliziun da l'US.» Tgi sa? Riefenstahl da sia vart ha tgrirà e pratigà l'art per l'art senza s'occupar da la propaganda politica che ses mandant, minister Joseph Goebbels (1897–1945), fascheva cun ils capodovras ch'ella realisava. Redactur Stefan Grisseemann deditgescha duas paginas a la vita e l'ovra da quella cineasta geniale che ha «pitanà cun il malfatg sut il vel da l'uscheditga bellezza (...). Ses film 'Triumph des Willens' (1934) ha erigì a Hitler in monument patetic d'extasa e nihilissem, ina poesia audiovisuala davart il (...) sesavel congress da la Partida socialista naziunala a Nürnberg (...). Ella guardava uschè bler ch'ella n'arrivava betg da patratgar» (pp. 154–155). Riefenstahl è stada in da quels umans che mettan in grond talent artistic u litterar al servetsch d'in reschim criminal.

\* **Adressa: Lindengasse 52, A-1070 Vienna.**  
**Fax 0043 1 535 32 50.**  
**Posta electronica: redaktion@profil.at**